

Der unvermeidliche Dodel-Blues

Text: Tom Lackner

1. I moch mei Hock'ng – Sehr brav! – schdöh kane Fro'ng
I tua ollas, vos de Schäfität'n so'ng
Eafüh mei Pflicht und kenn kan Schpass
Wöe auf mei Bledheit is Valass

Es tuat so guat – waunn ma nix siecht
Wos do rund um an herum so ollas g'schiecht
Wöe is des Hirn eascht amputiat
Daunn lebt si's völllich unscheniat

2. I tua nix les'n und schau vüh fean
Do gibt's de Gameshows und de siech i hoit so gean
De gaunz'n Seif'mopan lieg'ng keaz'ng'rod auf mein' Niveau
Und dar Tschecherant'nschtadl sowieso

Des is hoit Balsam – fia's Gemüt
Waunn im Dreiviat'ltakt de Depp'mmusi schbüht (*Holareidüüh!*)
Wöe is des Hirn eascht amputiat
Daunn lebt si's völllich unscheniat

3. I bin des Soiz dea Republik
Wöe wo schtandat ohne mi de Politik?
Ohne so Weh, denan s' aum Schäd'l scheid'n kennan ois wia
Und de daunn a no „Danke!“ so'ng dafia

Bridge Nua ignorant sein is scho wiaklich a wos Feines
I hob a nix ge'ng so a g'sunde Amnesie
Oba den echt'n Kick, den gibt da hoit nua Eines
Des is de guade oide Lobotomie

4. Zwa klane Schnitt' und scho vuabei
Und Du wiast se'ng, d'rauf is dar ollas einalei
Wöe is des Hirn eascht amputiat
Daunn lebt si's völllich unscheniat

Gib Dein' Vaschdaund en Gnod'nschdoß!
Daunn und nua daunn bis'D wiaklich olle Sua'ng los
Wöe is des Hirn eascht amputiat
Daunn lebt si's völllich unscheniat

Wöe is des Hirn eascht amputiat
Daunn lebt si's unvadross'n, frei und unscheniat